

CYNGOR CYMUNED LLANBERIS

COFNODION CYFARFOD MIS TACHWEDD 2020:

Cofnodion Cyfarfod y Cyngor yn y Ganolfan nos Fercher yr 11eg o Dachwedd, 2020 am 7 y.h.
Estynwyd croeso i'r aelodau wrth iddynt ddod yn ôl eto i'r Ganolfan gan ddefnyddio'r holl ystafell i gadw pawb arwahan. Unwaith eto dilynwyd rheolau caeth o ran diogelwch, ac atgoffwyd pawb i roi gwybod os bydd unrhyw newid yn iechyd yr aelodau yn y dyddiau ar ôl y cyfarfod.

1 PRESENNOL ac YMDDIHEURIADAU:

Ward Padarn: Rhys ap Gwilym (Cadeirydd), Gwilym Evans, Bethan Holding, Heather L Jones, Cyng. Kevin Morris Jones, Kim Jones, Claudia O'Donnell, Helen Sharp, Trystan Thomas.

Ward Peris: Iola Owen.

Hefyd yn bresennol: Dei Tomos (Clerc).

Ymddiheuriadau: Olwen Gwilym, Iwan Harding, Llinos Haf Pritchard.

2 DATGAN BUDDIANT:

Cofnodir, os yn berthnasol, o dan y gwahanol benawdau.

3 CADARNHAU COFNODION:

Cadarnhawyd cofnodion cyfarfod nos Fercher 14 Hydref, 2020 fel rhai cywir ac fe'u harwyddwyd gan y Cadeirydd. Cynnig ac eilio: BH / IO.

4 MATERION YN CODI O'R COFNODION:

1. Cynllun Cyfaill:

Y gwasanaeth yn dal ar gael, ond prin yw'r defnydd.

2. Ffordd A4086 a Llifogydd:

Bu'r ffordd ar gau ddwy waith ers y cyfarfod diwethaf, a gwyddom fod un car wedi ei ddifetha. [Roedd wedi ei barcio am o leia bythefnos ger Adwy Ffordd Haearn.] Bu'r Clerc a'r Cynghorydd mewn cysylltiad a Cyngor Gwynedd (CG), cafwyd cydnabyddiaeth i'w llythyrau a'u galwadau gael eu derbyn ond dim mwy na hynny. Yn ôl a ddeallwn bu trafodaeth rhwng y Prif Beiriannydd Sirol a'r Peiriannydd Ardal, ond chafwyd dim gwybodaeth pellach.

3. Lampau Stryd:

Torrwyd y brigau a oedd yn cysgodi'r lampau yn Llanberis. Hefyd diffoddwyd y lamp ger yr Hafod, Nantperis a chafwyd addewid y byddai'r un ger Tangadlas yn cael ei thrwsio. Yn ôl CG roedd angen cael cwmni SP i wneud y gwaith angenrheidiol, a rhybuddwyd y byddai mis o oedi o leia cyn i'r gwaith gael ei gwblhau.

Dywedwyd fod lamp ar Lôn Fain, yn y Nant hefyd wedi diffodd.

4. Coed Nadolig:

Cafwyd adroddiad fod y coed wedi eu harchebu i Lanberis a'r Nant ac y byddant yn cyrraedd ar 27 Tachwedd. Bydd angen gwirfoddolwyr i'w codi a'u goleuo ar y Sadwrn neu'r Sul canlynol os na fydd y tywydd yn caniatáu. Nodwyd fod angen archebu rhagor o oleuadau, ynghyd â goleuadau ar gyfer coed ychwanegol ym mhen dwyreiniol y pentref.

5. Cae Chwarae Min y Llyn:

Ers y cyfarfod diwethaf roedd y Clerc gyda cymorth un o swyddogion CG wedi ceisio cael pris lleol am ail wneud y darn cwrs rhaffau a choed yn y maes chwarae, ond hyd yma heb lwyddo.

Yn y cyfamser bu KMJ a'r Clerc yn cyfarfod Diane Rowlands o gwmni First Hydro i drafod y posibilrwydd o gael cymorth tuag at y gost. Yn anffodus roedd y cyfarfod nesa o pwyllgor grantia'r cwmni o fewn ychydig ddyddiau ac felly byddai'n amhosib gwneud cais mewn pryd. Dywedodd DR y byddai'n amlinellu ein bwriad i'r pwyllgor, a gan fod cryn dipyn o arian ar ôl eleni oherwydd amgylchiadau Covid-19, byddai'n barod i dderbyn cais hwyr, cyn belled a'i fod i mewn erbyn diwedd Tachwedd. Oherwydd y brys roedd y Clerc am geisio gwneud un ymdrech arall i gael ail bris, cyn y byddai'n rhaid bwrw 'mlaen i wneud y cais i First Hydro. Os y byddai'n llwyddo i gael pris arall yna byddai'n ymgynghori trwy gyfrwng electronig i gael barn aelodau'r Cyngor. Os byddai'r cais grant yn llwyddianus byddai am offer ond nid llafur.

6. Sul y Cofio:

Adroddwyd i'r dorch gael ei gosod ar y gofeb ar fore Sul y Cofio. Gan nad oedd gwasanaeth roedd rhai wedi dod ynghyd erbyn 11 pan chwythwyd y corn i nodi dau funud o dawelwch er coffawdwriaeth, ond roedd pawb wedi ymddwyn yn unol a rheolau Covid-19.

7. Grwp Llanberis:

Cafwyd adroddiad gan y Clerc iddo ef a'r Cynghorydd KMJ fynychu dau gyfarfod Zoom/Teams i drafod sut i ymdrin a rhai o broblemau presennol Llanberis sy'n deillio yn bennaf o'r llu ymwelwyr a ddaw yma a'r digwyddiadau a gynhelir ar faes Dôl y Goeden ac mewn mannau eraill.

Y bwriad ydi trefnu nifer o is grwpiau i edrych ar wahanol ddigwyddiadau a phroblemau, e.e. digwyddiadau, parcio, masnachu, sicrhau budd economaidd yn ogystal ag ystyried effaith hynny ar y gymdeithas leol.

Bydd Grwp Llanberis yn cadw trosolwg dros y grwpiau eraill a sefydlwyd neu a sefydlir yn y dyfodol agos. Yn y cyfarfod cyntaf gyda dau o swyddogion CG trafodwyd sut i weithredu ac aelodaeth y Grwp

Un grwp sy'n gweithredu eisioes ydi'r un ar gyfer 'Digwyddiadau', gyda nifer o swyddogion CG, un o Awdurdod y Parc Cenedlaethol (APCE), nifer yn cynrychioli cwmnïau sy'n trefnu digwyddiadau (rasus rhedeg) mawr ynghyd a KMJ a'r Clerc.

Yn y cyfarfod cyntaf cafwyd braslun o bwrpas y grwp i geisio dod a threfn i'r digwyddiadau niferus yn Llanberis bob blwyddyn ynghyd ag ystyried lle i'w lleoli er mwyn lleihau'r ymyrraeth ar y pentref a'r trigolion lleol a ddaw yn sgil eu cynnal ar Ddôl y Goeden. Mae nifer o'r cwmnïau yn ymwybodol fod cael cefnogaeth leol yn bwysig ac felly yn awyddus i sicrhau nad yw eu digwyddiadau yn ymyrryd yn ormodol a'r gymuned leol. Mae rhai yn awyddus i gael trefniant hir dymor, er mwyn iddynt gael sicrwydd i'r dyfodol, yn naturiol byddai hynny yn ddibynol ar drefnusrwydd. Nodwyd yn y cyfarfod fod dwy ras fawr wedi eu symud o Lanberis, un i Ryd-ddu a'r llall i Gapel Curig.

Yn ôl swyddog Awdurdod y Parc (APCE) mae'n amhosib bron i'r Awdurdod wahardd nac atal pobl a chymdeithasau neu gwmnïau rhag defnyddio'r Wyddfa ar gyfer digwyddiadau. Mae'r llwybrau yn rhai cyhoeddus ac wrth gwrs mae hawl mynediad i 'dir agored' o dan Ddeddf Cefn Gwlad a Hawl Tramwy 2000. Ond mae'r Awdurdod yn ceisio gyda chydweithrediad defnyddwyr i reoli'r gwahanol weithgareddau a dyna sy'n digwydd bellach wrth i bawb bron oedd yn trefnu unrhyw ddigwyddiad gysylltu yn gyntaf a'r Awdurdod. Ychwanegwyd bod y pwysau'n cynyddu yn gyson ac mae hynny cyn cymryd i ystyriaeth y miloedd a ddaw i gerdded i'r copa fel unigolion neu griwiau bychan.

Bydd Grwp Llanberis yn cyfarfod eto cyn diwedd y flwyddyn a'r un 'Digwyddiadau' yn y flwyddyn newydd.

5 MATERION ERAILL:

1. Gosod Tai:

Unwaith eto cafwyd cwynion am y ffordd y mae tai yn cael eu gosod gan Adre, y cwmni sy'n rheoli tai cyhoeddus ar rent. Yn ddiweddar dywedir fod pobl sy'n wael neu'n dioddef o gyflyrau anghymdeithasol wedi cael ty/fflat yn Llanberis ac mae hynny wedi ymyrryd yn ddifrifol a bywydau trigolion cyfagos. Holwyd a oedd Adra yn ystyried holl anghenion pobl oedd yn cael eu lleoli yma yn ogystal ac effaith hynny ar gymdogion agos.

2. Cystadleuaeth Goleuadau Nadolig:

Awgrymodd KMJ y dylem gael cystadleuaeth i weld pa stryd sydd wedi ei goleuo orau ar gyfer y Nadolig. Bu peth trafod a chytunodd KMJ i'w threfnu gyda'r Cyngor yn cynnig gwobr o £100 i'w roi i elusen o ddewis y stryd fuddugol. Bydd y beirniadu trwy gyfrwng pleidleisiau ar Facebook.

6 GOHEBIAETH:

1. CG - Llinellau Melyn:

CG yn ymgynghori ynglyn â bwriad i osod llinellau melyn dwbl i atal parcio bob ochr i'r ffordd draw o Ffordd Osgoi Llanberis at y pyllau a'r meysydd parcio ar lan Llyn Padarn yn Y Glyn. Bydd y llinellau hyd at yr ail fynedfa i'r ail faes parcio ac yn cynnwys y pwt o ffordd i mewn i'r Stad Ddiwydiannol. Mae'r Cyngor hwn wedi pwysu am hyn ers tro byd, gobeithio y bydd y cynllun yn llwyddo y tro hwn.

NB: Adroddwyd bod 'motor home' wedi parcio yno am ddyddiau yn ddiweddar.

2. APCE:

Hysbyseb fod Cronfa Prosiectau Cymunedol ag arian ar gael i gefnogi cynlluniau cynaliadwy yn y gymuned a fydd o fudd economaidd, cymdeithasol, neu amgylcheddol o fewn y Parc Cenedlaethol. Ni nodwyd dyddiad cau.

7 CYNLLUNIO:

• **C20/0821/15/LL** - cais ar gyfer dymchwel estyniad cefn (rhannol unllawr a rhannol deulawr) a chodi estyniad deulawr yn ei le - **1 Ffordd Padarn, Llanberis** - dim sylw (methwyd a darganfod y cais)

8 MATERION ARIANNOL:

1) Yn y Banc ar yr 28ain o Hydref, 2020

Cyfrif Cyfredol: £21,950.12 Cyfrif Cadw: £5,365.74

2) Cadarnhawyd y taliadau canlynol:

CYFANSWM ... £1,144.60

3) Arian a dderbyniwyd rhwng 29/09/2020 a 28/10/2020:

CYFANSWM ... £370.04

Cynnig ac eilio: HS / TT.

9 LLWYBRAU

Ystyriwyd adroddiad GE ar y llwybrau a phenderfynwyd fod angen ymdrech arall i ddatrys problem y llwybr oedd wedi ei rwystro ger Pyllau Dŵr. Adroddwyd hefyd fod giat neu ddwy angen eu hongian. Dywedodd y Clerc y byddai'n ceisio cael rhywun i wneud y gwaith. Yn anffodus roedd EB wedi cael llaw driniaeth ar ei benglin ac yn debyg o fod yn methu cynorthwyo am rai misoedd.

Mae angen hefyd trwsio giat ar lwybr cyhoeddus heibio Tandderwen, Nantperis.

10 Y FYNWENT:

Adroddwyd nad oedd y giat i Fynwent yr Eglwys ger y Maes Chwarae yn Nantperis yn cau. Er mai cyfrifoldeb yr eglwys ydi'r giat cytunwyd fod y Clerc yn chwilio am rywun i'w thrwsio rhag i ddefaid grwydro yno.

11. ADRODDIADAU ALLANOL:

Y Ganolfan:

Wedi ei hail agor ar ôl y Clo byr oherwydd Covid-19.

12 CYFARFOD NESAF:

Dyddiad y cyfarfod nesaf yn Y Ganolfan os bydd amgylchiadau yn caniatáu. 7 y.h. Nos Fercher 09 Rhagfyr, 2020.

Arwyddwyd a chafwyd yn gywir:

Cadeirydd: Rhys ap Gwilym

Clerc: Dei Tomos

Dyddiad: 09 Rhagfyr, 2020.